

Date – 24/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Ni 3 cham turin Finance Commission 16-na member-ten an chairman Dr. Arvind Panagariya hovin Mizoram an rawn tlawh.
2. FC 16-na lo zin tur avang leh Nilaini khi sorkar pisa chawlh a nih avangin Mizoram assembly inkhawm kal lai chu tunkar chhung zawng chawlh a ni ang.
3. Prime Minister Narendra Modia chuan mitin tana hriselna tha chu sawrkarin Sabka Saath, Sabka Vikas tihhlawhtlinna lungphum pakhat a ni a ti.
4. Prime Minister Narendra Modia chuan Artificial Intelligence AI ah India chuan nasa takin hma a sawn a ti.

<><><>

FINANCE COMMISSION

An charman Dr. Arvind Panagariya hovin Finance Commission 16-na member-te chuan nimin khan ni 3 cham turin Aizawl an rawn thleng.

Finance Commission chairman leh member-te hi Thawhlehi thleng cham tura lokal an ni a. Finance department hotute sawi danin Mizoram sorkar chuan Finance Commission 16-na hnena Mizoram sum mamawhte lo thlenna tur memorandum chu an peihfel tawh a. Sawihona hnahnung ber pawh a hmawr an bawh tawh a ni. FC 15-na khan Mizoram tan, a bik takin post devolution revenue deficit grant (PDRDG) hmangin kum 2021 leh 2026 inkar chhung atan cheng vaibelchhe 6,544 chauh kum 5 atan Mizoram a ruahman sak a. Hei hian Mizoram sum harsatna a phuhru pha lo hle niin finance department hotute chuan an sawi a. Hei bakah hian tualchhung sorkar inrelbawlana atan cheng vaibelchhe 713 ruahman a ni a. Cheng vaibelchhe 259 chu chhiatrupna thlen thulha chhawmdawlana tur leh hriselna lam tan cheng vaibelchhe 115 ruahman a ni bawh.

PDRDG bikah Mizoram chu kum 2021-22 atan cheng vaibelchhe 1,790 ruahmansak a ni a, 2022-23 tangka kumah cheng vaibelchhe 1,615 ruahman a ni a, kum 2023-24 tangka kum atan cheng vaibelchhe 1,474 ruahman niin tangka kum kallai 2024-25 atan cheng vaibelchhe 1,079 ruahman a ni a. Tangka kum thar 2025-26 atan phei chuan PDRDG hnuaiah cheng vaibelchhe 586 chauh Mizoramin a hmu tawh dawn a ni.

Mizoram sum dinhmun hi Covid-19 hrileng khan a tichhe zual nasa hle a, sum hmuh tura beisei lawk cheng vaibelchhe sang tel dawn kim loh a awm a ni.

Hei hi a dinhmun a nih avangin FC 16-na lakah hian sorkar beiseina a sang a, eng ti ang takin nge sum an ruahman ang tih erawh a hriat loh.

FC 16-na lo zin tur avang leh Nilaini khi sorkar pisa chawlh a nih avangin Mizoram assembly inkhawm kal lai pawh tunkar chhung zawng chu an chawl dawn niin Assembly secretariat atanga thudawn chuan a sawi a ni.

FC 16-na lo zinte hi nimin khan I&PR Minister Dr. Vanlalhlana, Adviser to Chief Minister Pu TBC Lalvenchhunga, chief secretary Pu Khilli Ram Meena, PWD, Disaster Management & Rehabilitation Department leh Geology & Mining Department hotute’n an lo dawngsawng a. Lengpui atanga Aizawl an panna-ah Hunthar lei tla hniam chu a hmunah endikin ruahmannate an sawiho a ni.

He hun ah hian Disaster Management & Rehabilitation Department-a thawktute leh Public Works Department hotute chuan kum 1990 atanga 2024 chhung a helai hmun a leilung chet dan leh inkalpawhna kawng a harsatna hrang hrang a thlen thin dan te tarlangin lei tawlh hniam zel tur ven nana hmalakna thenkhat kalpui a nih dan te an sawi a. Mizoram khawpui Aizawl luhchhuahna kawng pawimawh tak a nih avangin leh helai hmun a chengte tan harsatna lian zawk a thlen loh nan ruahmanna an duan te chu an hrilhfiiah bawh a ni. He hun a tarlan danin Hunthar lei tla hniam nghawng zau zawng hi hectare 24.3 zet a ni.

Vawiin hian chief minister leh official-te nena an inkawmho ang a, hetah hian Mizoram sorkar lamin memorandum thehlutin Mizoram mamawh hrang hrang an thlen ang a. Chawhnu dar 12 leh minute 40-ah Aijal Club-ah chanchinbumite an kawm ang a, flawmngai pawl leh pawl dang dang an kawm bawh ang. Naktuk hian chairman chuan Delhi pana Aizawl chhuahsanin member-te leh anmahni zuitu official-te chuan Zoram Medical College & Hospital flawh pahin Thenzawlah an thleng anga zan an riak ang a, Serchhip district bawrhsapin hnam ziarang lan theihna entirna hun huaihawtin zanriah a buatsaihsak ang a. A tukah Serchhip khawpui lutin heta tang hian helicopter hmangin Lengpui tum hmun an pan ang a. Lengpui atang hian Delhi lamah an haw leh dawn a ni.

<><><>

ASSEMBLY-CESS

Tangka kum 2020-2021 atanga tangka kum 2024-2025 chhunga Mizoram sorkarin Labour Cess a hmuh zat chu cheng vaibelchhe 183, nuai 34 sing 5 sang 6 leh 74 leh pawisa pawisa 62 a ni.

Labour, Employment, Skill Development & Entrepreneurship Department minister Pu Lalnghinglova Hmar-in MNF member Pu Ramthanmawia zawhna Assembly Housea a a chhan danin tun tangka kum kal lai mek 2024-2025 chhung hian sorkarin cess cheng vaibelchhe 57, nuai 19, sing 5 leh 253 a hmu a. Kum 2020-2021 khan cess cheng vaibelchhe 14, nuai 6, sang 9 leh 340 a lut a, a kum leh tangka kum 2021-2022 khan cheng vaibelchhe 22, nuai 87, sing 5, sang 8 leh 491 a lut leh a. Kum 2022-2023 khan cheng vaibelchhe 42, nuai 29, sing 8, sang 8 leh 182 a lut a, kum 2023-2024 khan cess cheng vaibelchhe .46, nuai 91, sing 4, sang 9 leh 808 a lut a ni.

<><><>

ASSEMBLY WATER SUPPLY

Mizorama district hmunpui hrang hrangah Hnahthial leh Serchhip khawpui-in tui an dawng zing ber a, Mamit khawpui-in an dawng khat ber.

PHE minister Prof Lalnilawma'n Assembly a BJP member Dr. K. Beichhua zawhna a chhan danin Hnahthial leh Serchhip khawpui a chengte hian thla khat chhungin vawi 4 emaw vawi 5 emaw tui an dawng thin a. Khawzawl leh Saitual khawpui a chengte'n thla khatah tui vawi 4 an dawng a. Aizawl khawpui a chengte'n thla khatah vawi 3 an dawng thung. Siaha, Champhai leh Kolasib khawpui a chengte'n thla khatah vawi 2 emaw vawi 3 emaw tui an dawng a. Lunglei leh Lawngtlai khawpui a chengte'n thla khatah tui vawi 2 an dawng a, Mamit khawpui a chengte erawh chuan thla khatah vawi khat chauh tui an dawng a ni.

<><><>

SPL. RATION CARD

Mizoram sorkarin khawsak harsa zawk te tana State Special Ration Package a duan hnuaiah ration buhfai (ration card sen) man tlawma dawngtu mi 29,785 an awm tawh.

Nikum December 2024 atanga khan Mizoram State Special Package hi hman tan a ni a, he ruahmanna hnuaiah hian mi pakhat tan buhfai Kg.8 zela sem niin, kg ah cheng 20 in an khul thei a ni. Heng mite hi kg khat cheng 30/-a buhfai la thin card var neitute zing ami an ni hlawm. Food, Civil Supplies and Consumer Affair department chuan card sen mamawhte tan mahni bialtu DCSO-ah dil theih a nih thu hriattirna a tichhuak a. Tun dinhmunah AAY (card eng) hnuaiah Mizoram-ah ration card 25,750 awmin, hlawkpuitu mi 62,964 vel an awm a. PHH (card pawl) hnuaiah ration card nuai 1, sing 5 leh 555 awmin, a hmang tangkaitu mi nuai 6, sing 3, sang 3 leh 980 vel an awm thung. Mizoram puma non-NFSA (card var) hnuaia ration card hi nuai 1, sang 6 leh 589 niin, a hmangtu mi nuai 4, sing 4, sang 1 leh 902 an awm mek. Hetih lai hian ration lakna atana hman ni lo NER (not entitled ration card) 206 a awm mek a, heng ration card hi document atan chauha hman tur a ni a, NER chungchangah hian Food, Civil Supplies & consumer Affairs Department chuan nikum July thla khan thuchhuah siamin Minister, MLA leh Group 'A' officer chinte chu NER card-ah inlet vek turin a lo hriattir tawh a ni, tunah hian group 'A' chin list dil mek nia thu dawn a ni.

<><><>

ASSEMBLY SESSION

Assembly inkhawm kal mekah sorkar atanga dan siam tur duan a changtu minister-te'n an putluh tur 8 a lut tawh.

Assembly secretariat atanga thu dawn danin dan siam tur leh dan dinglai siamthat tur lutte hi - Labour, Employment, Skill Development & Entrepreneurship (LESDE), Urban development & poverty alleviation (UD&PA), Finance, Higher & Technical Education, Information & Public relations, Excise & Narcotics leh Local Administration department te a ni a. LESDE hian bill pahnih an thehlut ni a hriat a ni. Sorkar bill thehluh zinga ngaihven hlawh zual chu Excise & Narcotics minister-in a putluh tur wine leh beer chungchanga Mizoram Liquor (Prohibition) Act, 2019 siam thatna tur leh Higher & technical education minister Dr. Vanlalhlana'n Mizoram state

university bill a putluh turte hi a ni awm e. Sorkar dan siam tur chhawpchhuahte hi March ni 3 (Thawhtanni) leh March ni 6 (Ningani) te khian putluh a sawiho a ni dawn niin business advisory committee (BAC)-in assembly inkhawm hun hman dan tur a duan lawkah tarlan a ni.

March ni 20 thleng awh tur assembly inkhawmah hian tun thlengin House chhunga chhan chi zawhna 889 a lut tawh a, ziaka chhan chi zawhna 104 a lut tawh bawk a. House dawhkana dah tur lehkha pawimawh 8 a lut tawh a, official resolution putluh tur 1 a a lut tawh bawk. Puan tawh angin tun tum budget session-ah hian March ni 4 khian finance changtu chief minister Pu Lalduhoma'n tangka kum thar (2025-2026) a Mizoram tana sum ruahman (budget) leh tangka kum kal lai a sum dil belhna (supplementary demands for grants for 2024-2025 chu House-ah a pharh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PM

Prime Minister Narendra Modia chuan mitin tana hriselna tha chu sawrkarin Sabka Saath, Sabka Vikas tihhlawhtlinna lungphum pakhat a ni a ti.

Madhya Pradesh-a Chhatarpur district-a Bhageshwar Dham Medical and Science Research Institute a hawwnaah he thu hi sawiin Pu Modia chuan he institute hian mi rethei cancer veite tan a thlawna enkawlina a pe dawn a ti.

Ram acre 10-a zau awh tur anih thu sawiin a tirah khum 100 dah phawt a ni ang a ti a. Cancer hospital hi tunlai khawl tha leh doctor thiam ber bera thuam a ni ang a ti a. Cancer natna enkawlina turin sawrkar chuan kumin budget ah sum tam tak a dah tih a sawi bawk a ni.

<><><>

MANN KI BAAT

Prime Minister Narendra Modia chuan Artificial Intelligence AI ah India chuan nasa takin hma a sawn a ti. Nimina Akashvani-a Mann Ki Baat Programme ah he thu hi sawiin Prime Minister Modia chuan India mite chu thiamna thar technology hman leh inzir kawngah phak loh tumah an nei bik lo a ti a. Tunhnaia Paris-a AI Action Summit a hmannaah India hmasawwna khawvelin a fak chu lawmawm a tih thu a sawi bawk a ni.

PM Modia chuan thla hmasa lawkah ISRO in rocket 100-na an kapchhuak thei chu lawmawm a tih thu a sawi a. Space Scientist zingah hmeichhia an pung chho telh telh chu ropui a tih thu a sawi bawk a ni.

<><><>

J&K

Jammu and Kashmir Lieutenant Governor Manoj Sinha hoin nimin khan Raj Bhavan-ah Mizoram leh Arunachal Pradesh State Day hman a ni. Mizoram leh Arunachal State Day ni Febraury ni 20 a ni a, Nimin khan Jammu-a Raj Bhavan-ah he hun hi hman niin Lt.Governor Manoj Sinha chuan Arunachal Pradesh leh Mizoram atanga ram zalenna sualtu mi ropuite zahna a hlan a. Ram tana inpe leh zual tur leh khawtlang rawngbawl tura inpek leh zual a tul thu he hun hian hriatchhuah tir se a duh thu a sawi. Hei bakah hian Lt.Governor chaun Mizoram leh Arunachal Pradesh hmasawnna kawng zawh chhoh dan te tarlangin state pahnih mipuite chu hmasawnna chak taka nei chho zel turin duhsakna a hlan a ni.

<><><>